

503 補充教材-1:論語

姓名: _____

論道德

- 1 子曰：「參乎！吾道一以貫之。」曾子曰：「唯。」子出。門人問曰：「何謂也？」曾子曰：「夫子之道，忠恕而已矣！」（里仁第四·一五）
- 2 子曰：「德不孤，必有鄰。」（里仁第四·二五）
- 3 子曰：「巧言亂德，小不忍則亂大謀。」（衛靈公第一五·二六）
- 4 子曰：「道聽而塗說，德之棄也。」（陽貨第一七·一四）
- 5 子曰：「鄉原，德之賊也。」（陽貨第一七·一三）

論仁愛

- 1 顏淵問仁。子曰：「克己復禮為仁。一日克己復禮，天下歸仁焉。為仁由己，而由人乎哉？」顏淵曰：「請問其目。」子曰：「非禮勿視，非禮勿聽，非禮勿言，非禮勿動。」顏淵曰：「回雖不敏，請事斯語矣。」（顏淵第一二·一）
- 2 仲弓問仁，子曰：「出門如見大賓，使民如承大祭。己所不欲，勿施於人。在邦無怨，在家無怨。」仲弓曰：「雍雖不敏，請事斯語矣。」（顏淵第一二·二）
- 3 樊遲問仁，子曰：「居處恭，執事敬，與人忠，雖之夷狄，不可棄也。」（子路第一三·一九）

- 4 子張問仁於孔子。孔子曰：「能行五者於天下，為仁矣。」請問之。
曰：「恭、寬、信、敏、惠。恭則不侮，寬則得眾，信則人任焉，敏則有功，惠則足以使人。」（陽貨第一七·六）
- 5 司馬牛問仁。子曰：「仁者，其言也訥。」曰：「其言也訥，斯謂之仁矣乎？」子曰：「為之難，言之得無訥乎？」（顏淵第一二·三）
- 6 子曰：「剛、毅、木、訥，近仁。」（子路第一三·二七）
- 7 子貢曰：「如有博施於民，而能濟眾，何如？可謂仁乎？」子曰：「何事於仁，必也聖乎！堯舜其猶病諸！夫仁者，己欲立而立人，己欲達而達人。能近取譬，可謂仁之方也已。」（雍也第六·二八）
- 8 子曰：「仁遠乎哉？我欲仁，斯仁至矣！」（述而第七·二九）
- 9 子貢問為仁。子曰：「工欲善其事，必先利其器。居是邦也，事其大夫之賢者，友其士之仁者。」（衛靈公第一五·九）
- 10 子曰：「里仁為美。擇不處仁，焉得知？」（里仁第四·一）
- 11 子曰：「當仁，不讓於師。」（衛靈公第一五·三六）
- 12 子曰：「志士仁人，無求生以害仁，有殺身以成仁。」（衛靈公第一五·八）
- 13 子曰：「不仁者，不可以久處約，不可以長處樂。仁者安仁，知者利仁。」（里仁第四·二）
- 14 子曰：「苟志於仁矣，無惡也。」（里仁第四·四）